

Handves vir die transformasie van die Franschoekvallei

[1.1 Die beginsel van 'n gedeelde toekoms]

Ons, die mense van die Franschoekvallei, vorm 'n gemeenskap, dit wil sê ons is 'n groep mense wat op dieselfde plek en tyd saam lewe en werk. Ons beïnvloed daarom mekaar in ons daaglikse bestaan, of ons dit wil erken of nie. Ons deel ook die bestemming waaraan ons vorm gee – goed of sleg – as ons gesamentlike verantwoordelikheid.

[1.2 Die beginsel van verligte eie-belang]

Ons glo dat as ons ons kinders én komende geslagte se lewenskwaliteit wil beskerm en verbeter, ons aandag sal moet gee aan mekaar se omstandighede en die omgewing wat ons deel.

Om onself te help, moet ons ander help. As ons nie die behoeftes, verwagtinge en potensiaal van ander in ag neem nie, sal ons uiteindelik ook ons eie behoeftes, verwagtinge en potensiaal ondermyn. Dit sal ons nalatenskap aan die toekomstige geslagte wees.

[1.3 Die beginsel van goeie trou]

Dit is nie vir ons maklik om saam 'n gemeenskaplike bestemming te beplan nie. Ons is nie daaraan gewoond nie. Ons verhoudings dra die letsels van agterdog, wat uit 'n lang geskiedenis van konflik en misbruik spruit. Hierdie pynlike geskiedenis het vir ons almal op een of ander manier probleme veroorsaak: materieel, maatskaplik en godsdienstig. Die probleme wat uit ons gemeenskaplike geskiedenis spruit, is nog steeds met ons. So stel ons eise oor ons verblyfsreg: wé hier mag wees, en wie nie. En vergeet al te maklik dat ons mooi vallei – soos ons hele land – aan almal behoort wat hierin woon. Al is ons nie aandadig aan al die huidige probleme nie, moet elkeen die verantwoordelikheid aanvaar om daarvoor in goeder trou oplossings te vind.

Die transformasie van ons dorp en vallei begin by ons eie verandering; dit begin in ons harte. As ons onself bevry, maak ons ander vry. Wanneer ons onself hiertoe verbind, mag die onskatbare waarde wat integriteit, eerlikheid, vertrouwe en lojaliteit bied, ons vergoeding word, ongeag wat ons stoflike omstandighede mag wees. Slegs dan kan ons ons onderlinge verskille vier. Met hierdie doel voor oë, bevestig ons die volgende:

[2.1 Die probleem van etniese segregasie]

Al is ons 'n gemeenskap, lewe ons in verskillende wêreldes. Die maatskaplike samestelling van ons vallei – die patroon van vestiging en assosiasie (hoofsaaklik in verhouding tot etnisiteit, maar ook taal, kultuur, oorsprong, gods-

diens en politieke verbintenis) is skerp verdeel. Al deel baie van ons mense tale en kulturele praktyke, is ons steeds grotendeels gesegregeer in die etniese groeperings wat deur apartheid geïstitutionaliseer is.

Alhoewel ons lotgevalle ooglopend verstrengel is, het ons steeds relatief min met mekaar te doen, veral in ons alledaagse omgang. Ons ken mekaar nie regtig nie, en voel, of tree daarom nie op soos 'n hegte, geïntegreerde gemeenskap nie. Ons is geneig om onself nie as die gemeenskap van Franschhoek te beskou nie, maar as 'ons en hulle', as verskillende gemeenskappe.

[2.2 Die probleem van uiterste ongelykhede]

Ons is nie net onderling verdeel nie; ons is ook ongelyk. Die besit van hulpbronne – veral finansiële bates – is baie skeef verdeel in ons gemeenskap, grotendeels in ooreenstemming met etniese verskille. Hierdie ongelykheid is baie erg in ons vallei, dalk selfs erger as elders in ons land.

Die rede is nie dat 'n besonder groot deel van ons gemeenskap arm is nie, maar dat so 'n groot aantal ryk mense langs die armes leef. Dit is kommerwekkend, maar skep ook unieke geleenthede. Ons vallei het beslis nie 'n tekort aan hulpbronne nie.

[2.3 Die probleem van vaste siklusse van ongelykheid]

Soos gewoonlik, beïnvloed die besit van finansiële bates toegang tot hulpbronne van allerlei aard. Die ongelyke verdeling van welvaart word dan weer spieël en vermenigvuldig in talle verskille waarin opeenvolgende geslagte vasgevang sit. Die belangrikste hiervan is verskille in toegang tot werk- en sakegeleenthede, onderwys, behuising, gesondheidsdienste, veiligheid, vervoer, kinderversorging, sport en ontspanningsfasiliteite.

Die ontasbare verskille in selfvertroue en selfstandigheid is net so belangrik. Talle lede van ons gemeenskap is so deur hul verlede tot op die rand uitgedryf en benadeel, dat hulle tans nie die beskikbare geleenthede ten volle kan benut nie. Daarom is dit nie genoeg om net die speelveld gelyk te maak nie; stappe moet daadwerklik geneem word om die skade van die verlede reg te stel en tekortkominge te verlig.

Ons erken dat hierdie tekortkominge en ongelykhede ons in 'n bouse sirkel sal vasknoop wat die slagofferskap van die armes sal voortsit – as ons nie iets daaraan doen nie – en selfs die ongelykheid in ons midde vergroot.

[3.1 Die herbevestiging van onderlinge interafhanklikheid]

Al die onbillikheid – én die vrees en vervreemding, arrogansie en ontkenning, frustrasie en wrok, wanhoop en skaamte wat dit skep – bring vir ons almal skade. Van die opsigtelikste skadelike gevolge is die ergerlike misdaad, haat (ook self-haat), wye drank en dwelmmisbruik, huishoudelike geweld, die verwaarlosing van kinders, rondlopery en bedelary, vreemdelingehaat, moedverlorenheid en 'n traak-my-nie-agtigheid oor die toekoms, en slagofferskap

teenoor gierigheid en die oordrag van materialistiese en selfsugtige waardes. Hierdie negatiewe gevolge versterk mekaar onderling, en vermenigvuldig al te maklik. Baie daarvan is subtiel, selfs listig van aard, maar dit bly vernietigend vir ons almal.

[3.2 Erkenning van 'n gedeelde omgewing]

Gegewe hierdie nypende probleme, word dit maklik uit die oog verloor dat ons almal afhanklik is van die fisieke welstand van die vallei. Behalwe as ons die beperkte hulpbronne in ons omgewing op 'n verantwoordelike en volhoubare manier bestuur en beskerm, en dit billik verdeel, sal ons almal uiteindelik die prys daarvan betaal, en ons kinders nog meer so.

[3.3 Herbevestiging van die verskille tussen die staat en die burgerlike gemeenskap]

Die burgers van 'n demokratiese staat verwag van hul verkose verteenwoordigers – op alle regeringsvlakke – om van hierdie nypende probleme aan te spreek. Ons sal dit aanhou verwag, asook leierskap, én die lewering van sekere dienste, én die duidelike afbakening van verantwoordelikheid en verantwoordbaarheid.

Omdat ons probleme egter nie uitsluitlik die regering se verantwoordelikheid is nie, onderneem ons, die mense van die Franschhoekvallei, om die volgende te doen:

[4.1 Ons taak voortspruitende uit probleem 2.1]

Ons sal saamwerk om 'n meer geïntegreerde en hegte gemeenskap te vorm. Ons sal die skeidslyne tussen ons probeer oorbrug, hoofsaaklik dié van etnisiteit, maar ook van taal, kultuur, oorsprong, godsdiens en politieke lidmaatskap.

Dit kan op verskeie maniere en op verskillende vlakke gedoen word. Dink byvoorbeeld aan sosiale uitnodigings en die aanvaarding daarvan, of die organisering van ope byeenkomste en feeste vir die gemeenskap. Deurgaans moet die gevolge van plaaslike ontwikkelings vir alle groepe in ons gemeenskap in ag geneem word.

[4.2 Ons taak voortspruitende uit probleem 2.2]

Ons sal saamwerk om 'n meer gelyke, welvarende en opgevoede gemeenskap tot stand te bring. Ons sal ons verskeidenheid vermoëns, talente en vaardighede bydra om die lyding en onwaardigheid van die armes te verlig, om mense van die buiterand na binne te bring, en om ons plaaslike ekonomie so te laat groei en ontwikkel dat dit werksgeleenthede skep vir almal wat wil werk.

Dit vereis allerlei inisiatiewe: van liefdadigheid tot belegging in maatskaplike ondernemings, mikrolenings en die aanpak van ander sake wat ekonomiese bemagtiging op die wyds-moontlike grondslag in ons vallei sal bevorder.

[4.3 Ons taak voortspruitende uit probleem 2.3]

Ons sal saamwerk om 'n gemeenskap te vorm met meer gelykwaardige toegang tot alle soorte hulpbronne.

Ons sal probeer om die skepping van menswaardige werksgeleenthede plaaslik te bevorder deur beroepsleiding, vaardigheidsontwikkeling en aansporingskemas, waar nodig. Ons sal die vermoëns en doeltreffendheid van al ons skole probeer onderskraag. Dit kan geskied deur finansiële bystand aan individuele leerlinge, en deur samewerking tussen die skole, ook ten opsigte van die gebruik van hulle hulpbronne en fasiliteite. Nie 'n enkele kind mag agtergelaat word nie. Ons sal dienooreenkomstig standarde en toegang tot basiese dienste probeer verbeter, asook tot behuising, gesondheidsorg, vervoer, kindersorg, sport en ontspanning.

[5 Vooruitsigstelling]

Ons glo dat ons ons toekoms in ons hande hou. Daarom wil ons – in alles wat ons doen – optree vanuit ons bewustheid en oortuiging dat ons gemeenskap deur verskeidenheid en interafhanklikheid gekenmerk word en dat ons 'n omgewing en toekomsbestemming deel.

Ons wil lede van 'n aktiewe burgerlike samelewing wees, saamgestel uit mense wat bewus is van hulle behoeftes, regte en verantwoordelikhede. Ons wil in 'n gesonde, produktiewe en sorgsame gemeenskap leef, waar die menswaardigheid van almal gehandhaaf en gevier word. Ons wil vry en gelukkig wees. Ons wil deel wees van wat Aartsbiskop Desmond Tutu die “Reënboognasie van God” genoem het.

Dit is nie 'n onbereikbare ideaal nie en ons sal nie dekades neem om dit te verwesenlik nie. Ons sal ons bestemming bereik wanneer ons vir ons medemens en ons dorp en vallei omgee op 'n daaglikse, realistiese en volhoubare grondslag – nié omdat iemand ons aansê om dit te doen nie, maar omdat ons glo dat dit in ons eie belang is om dit te doen.

Kom ons neem mekaar die hand en deel die verantwoordelikheid om by 'n beter bestemming uit te kom.

Ons, die volgende lede (synde inwoners en vriende van die Franschoekvallei te wees), onderneem om hierdie visie na te streef:

U word hartlik uitgenooi om hierdie dokument te kom onderteken op Donderdag 16 Februarie 2012 in die Kerksaal van die NG Gemeente Franschoek – of gedurende enige dag daarna in die Kerkgebou.

Skakel gerus met die Voorsitter van die Trust, dr Ernest Messina:

Selfoon: 083-571-1795

E-pos: emessina@mweb.co.za